


黔

記

360

336

却=





嘉慶十八年今少宰山陽李公以贊善督學黔中時巡撫某公以黔中地非甚寡糧數乃不敵一二縣於江蘇疑士民田多隱匿擬奏請全省丈量田公聞之駭甚而無說以折之也而某公自以不加賦而田得增多賦倍出爲

國家計久長意自得銳甚時時籌經費調屬吏議設官局事奏請卽行有日矣公初至黔時以黔中文獻隱失府縣志多缺不修無以稱

聖天子一道德廣文思之意乃檄各學校官訪鄉士大夫藏金石圖史歌謠志乘涉黔事者最上學使鈔錄發還而遂得錄御史包祚永丈田奏蓋乾隆初貴州學使鄒一桂請丈田而包公駁之得

黔記序

俞旨公得此奏則大喜示某公曰丈田議學臣嘗奏之駁不行今公發之必援前議解其駁議乃得申不然部議必駁公如曩時且以匿前駁不奏詰公卽公無辭某公見奏驚曰吾不意害乃如是非包君黔人固無由知請勿復言丈田事立廢局罷所調吏後他巡撫來以事遠文書多遺失恐後萌芽故列上其事而公爲少司徒乃得援前議詳復之事定不行方公檄學官上人家所藏書惟網羅放失舊聞將編爲黔記補田侍郎黔書之缺而已而遂得包御史奏以回某公之意以安黔中之民不然黔中固多山少平地民或以虛占不毛之土而實奪其可耕之田又以胥吏上下之手而丈其高下不可準之地使賄成於胥吏民財耗而官田不增其害小苟民田奪而官田遂增椎剝其



膚髓爲

國家經常之規則一朝而伏萬世之憂不難矣而黔之民得至  
今宴然無憂非公之功哉此一事也於是書足千古矣若夫鉅  
細悉備裨益雅俗有華陽志風土記之遺風覽是書者當自得  
之而有取焉道光十四年甲午二月門下士上元梅曾亮謹序



余於癸酉視學黔中爲期纔十閱月試纔閱六郡所聞見尠矣而足所歷與所採訪而得之者有爲田氏黔書及通志所未及載欲錄爲譚助顧以試事更續無少暇甲戌十月奉

命以祭酒旋京供職至澠陽登舟蓬窗無事一一追錄之二十六日畢記



黔記卷一

山陽李宗昉芝齡

貴州通志近今八九十年未加增葺以今所見聞考之纔十得四五耳余歷試六郡惟興義府見南籠舊志刊本二卷亦多缺略草志則有平越府志已缺一卷餘惟安順之安平興義之安南有草稿數冊仍抄撮通志殊無新得荒略如此考古者將何所徵信焉

省城外東南近城垣新建君子亭爲陽明也

海昌沈文學毓蓀號蘋濱字于澗僑金筑能詩其謁王文成公祠曰荒涼祠宇對斜曛儒術千秋大雅羣朱陸之間分一席孫吳而外有三軍牂州古驛生春草越國青山隔暮雲當日龍場

黔記卷一

一

曾瘞旅他鄉誰忍讀遺文旅店曉起云荒城一夕小淹留喔喔晨雞動客愁五夜霜風消宿酒四山煙瘴壓征裘清衙此去依嚴武逆旅何人識馬周閨裏金錢如問卜春分前已過思州沔陽張蓮濤錫穀署開泰縣令有秀才薛上國素不至縣廷忽通謁長跪而泣問何爲對以徑來一瞻好官越日上國死懷手書遺子姪戒毋爲不善中曰縣公清廉寡欲其後必有達人所藏張鴻臚銅雀瓦硯可持贈公子勸其力學蓮濤受其硯以名其齋

早熟稻名蟬鳴俗呼早市香

雞墘所生下有白蟻聚土如蜂房又名蟻奪采時人必蹲來歲可再得立則否羊肚菌亦生細草中



刺梨野生幹如蒺藜土人多種于籬落可辟猛獸其花如茶藤結實如小榴色黃多刺味甘微酸小兒食之消積滯搗汁入蜜煉之可爲膏各郡皆產越黔境乃無又一種重胎豔花紅紫間色可蒔爲玩名送春歸或云刺梨熟虎來食

蕪草卽燻麻其葉類麻多毛刺生籬落溪崖間刈並豨豨煮飼猪甚肥沃湯浴體可療瘋瘰墨莊漫錄云一種惡草羅生於野土人呼爲蕪麻其枝葉拂人肌肉卽成瘡疱潰爛久不能愈白香山詩蕪草四時香俗名火麻草

前胡遍生山谷間春初吐葉土人採爲菜味極香俗名羅鬼菜又名姨媽菜黔中婦女好遊相識卽通往來呼爲姨媽飯則必設此故名

木芙蓉花一日三變由白而紅至深紅極艷

女紅極精繡蟒不減于顧氏露香園者

夾酒初用釀燒酒法再用釀白酒法乃成

咂酒一名重陽酒以九日貯米于甕而成他日味劣以草塞瓶頸臨飲注水平口以通節小竹插草內吸之視水容若干徵飲量苗人富者以多釀此爲勝

菜豆腐入碎菜于豆汁成之又一種名連渣菜豆腐又有苡灰豆腐以苡梗燒灰罨過宿食之極嫩又有磨芋豆腐劇天南星磨漿以石灰苡灰水點成性寒質勁能祛風化痰解煤毒造者每閉戶避人有說鬼者則不成矣又名鬼芋豆腐或云卽藥品中土芋也



黔人好食臭腐物每歲三月洗白菜鋪巨桶中加以小米層菜層米滿則以巨石壓之至五月始開氣極惡沸湯食之頗以爲美也其汁治泄瀉痢疾甚効土人呼齏菜

貴陽竹枝詞三十首作者不知誰何擇錄數首以志土風最堪憑眺是東山放着晴天好去頑今日遊人定多少倩郎幫妾理釵環方言放着巧趕現成之謂也清明上冢近城隈縞素衣裳淡粉腮聽得阿誰憐少婦汗巾揩淚首重迴中秋月色最清佳鑼鼓喧闐笑語譁喬扮仙姬來送子背兜兜個大倭瓜妾轎迎來郎拜堂郎忙去謝妾爹娘合歡三日娘看妾滿月回門妾伴郎板橈條條坐綠鬟孃孃廟看豫陞班今朝比似昨朝好拷火連場演下山孃孃廟在指月堂拷火下山花戲也

江西新昌李騰華字鄴芸流寓黔中嘗主講遵義之湘川書院作研莊太守祠記曰遵義初郡於蜀

國朝雍正己酉改隸於黔州縣所屬者五人文遞時而盛東漢名儒尹道真先生今正安州產也郡舊有書院二一曰啟秀在郡署右一曰芹香在東城外在城塘街乾隆丁未衡山研莊劉公爲郡守民政無闕尤加意人文以啟秀庠隘又近衙市喧囂爰去在城塘二里而遠相地於湘山下縣學宮之側湘水環合其前古名穆家川者以爲吉倡屬官紳士輸金買得之建書院二楹中爲講堂堂兩廂及上楹左作室廿餘間爲生徒學舍門階庖湏宏麗具備名之曰湘川書院及劉公調任去旋卒郡人士懷水源之思奉公神主入書院祀之嘉慶乙亥余謬應今太



守鄖城蘆洲趙公聘承乏主講至則謁先師主於上楹之廳而未識劉公之有祀也嗣值附學江蘇劉生置笈於廳左廂之敬業齋其室小而隣庖視之則劉公神主在焉一板空懸香火冷寂余心惻然爲暫移先師座旁適夏間黔撫軍江西南城賓谷曾公新莅任首崇儒治檄行屬郡並祀道真先生於書院迄中秋新建特甫裘公來權縣入書院課士卽以視檄所應行無可位置尹先生主所初議於先師神龕左右設二座右祀尹右祀公然終以與先師並列未安也後遂定祀尹先生於芹香書院而更命工整理湘川院舍之朽壞者門墻乃奐焉復新先是講堂右廂學舍六間其第二間厯無生徒以居相傳劉公剏舍時有古冢掘出成之居斯室者必病竟有暴亡者咸謂冢靈爲祟

故畏居之余曰世有神不無鬼然其事恒幽渺誕妄夫選勝地建書院興人文劉公知政而能賢人莫不頌思久後卽掘冢他徙以成肄業之室鬼而靈亦何敢崇今旣惑於崇而曠而廢之不若就所曠廢改其室爲祠以妥劉公之神且藉以鎮肅人鬼相疑畏之意豈非一舉而數善者乎於是從學生徒皆曰師言昭躋哉遂相與量醵金資製龕改門飾壁備祠器擇吉期奉公神主入以祀更議存餘金作會每歲逢公誕辰咸來會祭是大異乎前此小室懸主而復喜後此之香火與人文永盛卽今諸生思源向學之美皆可爲述記也昔公於院之楹間隙地手植羣花樹梅竹尤繁後爲人伐剝盡有年矣今夏竹忽叢生秋初枯梅根產二青芝其肄業生徒竊蔚科名之瑞耶抑亦爲公立



祠之兆應也耶是未可知也並記之以告來者乙亥季秋月江  
西新昌後學鄴芸居士李騰華謹記

余得代由金筑歸京師鄴芸贈余序曰癸酉冬黔學使梁園戶  
部胡公秩滿

上命中允芝齡李公來代明年春按試各所屬華以胡公之薦  
得佐公幕與共晨夕出入者九閱月春仲公遷侍講自是累遷  
皆留任至孟秋奉授國子監祭酒來京供職之

旨繼使者編修程公至而公去矣公爲人溫穆沈厚學以攻經  
爲主文則視其體而於秦漢以來迄宋明

國朝無不並原於正派而得其神理氣骨之合不流於旁趨其  
爲政也一出所學軌士於正而九重勵其品斥浮取實無徇無

私故校閱僅六郡人咸惜其去之速而華之所惜與人同乃其  
意則尙有異於人者華質譎學疎濩落風塵老羈邊地生平無  
一見信於人而公乃以魁廷持世之才忘顯交窮文字緣投許  
通性命嘗與論行誼談古今無所於忤而於晨夕出入之間流  
連山水倡和詩篇剔搜顧戀益以深知其性情而非勢位人之  
所能有者屢言黔邦囿於一隅自陽明子提唱正學後及今二  
百餘載卽山川風土人物文章俱志乘荒寥偶有一二鈔本年  
遠辭略實甚待周歲試歷識此地有可委之教職諸生擇督探  
訪踵續黔記自作一書子當力襄其事華方自幸得謬出知識  
以副公成此不朽之業而公去矣此華所與黔人惜而黔人惜  
其速去與華同者而華意固並投契之深別有所異於人者也



若夫久暫之緣離別之感爲人世常有况公此去明良遇合一  
歲十遷造選天下名儒以共公異日成鈞衡之政而維持天地  
民物於弗墜者正足爲公速去喜而又何惜乎哉所有從公按  
視諸郡倡和十詩公瀕行屬並錄相遺爰書一冊弁以贈別一  
章而序其端公攜入京與華致意梁園戶部幸不辱其薦亦所  
以報知己也鄴芸斯文余未有一字可以稱者顧其生平不苟  
於言余雖不克當而於余所以記是編之意詳焉爰錄入記中  
並附以贈行篇暨所和之十詩其贈別詩和余題沈蘋濱集兼  
訂遊黔靈山韻云晁董才復生淮水奉使黔山植桃李約六經  
旨爲文章僞體屏嗤妄庸子來黔何遲去何速士習已見蒸雲  
起來黔之期舊杪冬吾因推轂識吾宗欣吾同門司成與華同爲胡希呂都

黔記卷一

六

憲取入學同藝術有言咸洽星斗胸轡車春駕接溽暑續歷秋山紅  
樹觀披沙剖璞六郡纔櫛去黔風沐去雨鴻儒結契九重深胃  
子鬢森槐市陰不私一隅

召掌監好教寰宇遍謳吟去黔之日踰秋顛遊山邀友芳樽倒  
知仁之樂關性情每遊戀踏斜陽草黔郊金碧仙佛祠石刻墻

高二妙詩黔靈及相寶棲霞山並有吳達善劉藻二制軍詩最佳爰集吳越風騷將共作

新詩一敵之參軍文學是日同遊者華與沈文學貴陽參軍董瑜薌雙會意連浮大

白沈沈醉醉揮綵筆走珠璣字字遙情念違背違背惟吾更念

君威鳳下許浮鷗羣交緣文字成性命司成贈華聯云主賓恰盡東南美文字都成性

緣序言何足與流芬黔靈再訂遊不負流漾清芬仗詩友司成題文

學集謂華爲文友文學爲詩友此別重逢定有無只今且酌離觴酒其十詩一



和余雪後行盤州山中

甲戌春華與擴菴楊二茂才應芝齡中允之招同赴習安閏二月三日子夜雪

四日晨霽及晚抵試院承

東以詩見示次韻奉酬陪從星輶涉雪同瓊天迴野眄璵瓏

一行冷鷺低迷白幾樹殘花小露紅曉景快收吟旆外晴光新

入鎖闈中當牕竹色凝寒綠三逕開來仰惠風又和余雙明洞

芝齡侍講出鎮寧州城遊雙明洞權牧金明府候送於此釣於潭得二尺鯉侍講留贈以詩時華前行差過之未獲同遊也步

原韻四迤邐岡巒列畫圖舊曾遊處記模糊雙明比似桃源遠

絕句 洞口漁人悵碧蕪佳水佳山繫古情况逢名勝傍官程幸他石

竇臨風雅新句冰雕雪鏤瑩於時景物竟何如刺史垂竿送客

初不是五雲天使到巖潭那得化龍魚跌坐天然自在身

洞層入遂遠石肖形各奇前洞大士像如塑俗名觀音洞雲根奇幻磔行人心期終下元章拜還

及遨頭接綺春又和余白水河小憩有序云白水河其地多黃

果樹故以樹名名村市過市分兩道一往雲南一往興義河流

瀉瀑所在道上並見之瀑對山有望水亭嘉慶二年爲叛苗所

燬亭左廢墻嵌二碑一爲奇豐額臬使所刻即臬使若伊詩一

爲陳學使本忠記瀑之偏麓有小直碑又有橫碣四朱字隔岸

視遠弗悉辨土人謂是昔產芝供水犀處瀑前大潭受瀑瀉水

相傳內有隱犀水綠如藍極深淨流入窄峽窈而伏

國初時孫可望督兵數千欲車涸出犀用力三日夜爲震雷雨

所止其瀑高百仞聲聞數里飛沫拂塗人若霧松余道過日當

杪春上浣盈路刺梨花盛發侍講詩云飛雪濺衣黃果樹亂紅

撩眼刺梨花蓋紀實也和詩云飛流噴雪近山家潭注深藍靄

峽斜望水亭殘連舊壘分途樹密間新花靈犀隱迹憐棹井機



石遺文憶斗榭隔岸猶傳芝茁處應凝雲氣孕丹砂又和余安

籠道中詩嘉慶甲戌季春芝齡侍講於安籠道中得詩題拙集次韻答謝作客風塵改壯顏年

周庚甲未緣慳生來原乞長淮水侍講籍淮安乾隆甲戌華生於淮安離使署生時有兆因

自號淮沔子天合隨看靡莫山黔地周曰靡莫輝映旌旗芳草碧鑑衡文字

夕陽殷清才妙友誇殊愧提唱宗工幸雅攀又和余播州道中

詩仲夏上澣由大定赴遵義途值雨潦阻宿黔西初十日抵試院芝齡侍讀屬和播州道中詩次韻征車信宿

海棠城黔西城中多海棠樹州署書屋一株尤大花繁而香數百年物也漲落谿田雨氣平茂

樹連山迷篋影叢篁夾道透泉聲客經播地眸能豁景似吳鄉

夢不成刻畫何須懷禹錫詩傳學士定知名侍讀原唱用柳子厚以柳易播事惜

劉長卿未到茲地無傳巖壑之勝者又題陳吉甫少尹詩甲戌仲夏隨芝齡學使於遵義試院陳吉甫少

府惠示什一詩鈔奉題一律即用鈔中和鄔仙坡謫仙樓詠稜原韻良朋晤待鎖闈開縹帙看從

黔記卷一

夜月來什一詩存迴雪句樓臺韻續聽鶯杯謫仙樓為李太白聽鶯處投金

有蹟曹司務下榻無緣笑語陪少府客秋會招余未應莫謾長才悲尉久

少仙品自出塵埃又和余遊黔三山詩季秋月朔二日芝齡祭酒招同楊擴莽茂才遊

相寶扶風棲霞三山得句奉呈雅遊竟日喜追陪到處登臨幾遲徊城市遠眸

隨境易峰巒生面逐樓開不煩車騎驚猿鶴祇引賓朋話茗杯

悵是旬時仙使去三山縹緲望蓬萊

杜鈞字景宋號藕莊江西新建人以進士為雲南太和縣令改

易門擢鎮雄牧以事謫戍貴陽能詩漢軍劉永安雲夢萬化成

大埔饒重慶並以州縣罷日相與吟詠重慶作落花落葉詩八

章咸屬和鈞成八十章人傳誦之

王覺蓮字夢白號醒齋貴筑人初覺蓮父母嘗祈子於旌陽宮



同夢老嫗手持折枝白蓮與之乃生覺蓮生而俊慧父母異之三四歲指字與識以多自喜其父母欲其繼家業爲賈至五歲自請讀書過目成誦出語驚其師長教之文藝詩詞若素習者共稱爲神童其補諸生中鄉試未冠也乾隆四年成進士選庶吉士散館授編修數遷階父母皆受封以歿仕至詹事

安南縣龍翔山一名巍山在縣東北五里山頂有洞洞中有天成石碓石爐

安南縣東哈馬關南老雅關極險峻外有盤江以爲固興義有魯溝卡爲南面之遠隘真天險之地而昔未有能守之者足見險不足恃

安南學舍傍有欲飛二大字在巨石上明總兵鄭子龍所書也

莫忙亭亦子龍建

庭聞錄載吳逆在滇開科取士有中式某任雲南某州知州大堂署聯云皂隸排衙渾如一天星斗本州坐堂好似五帝朝天又顏其廢曰廢焚軒余往大定過鎮西衛城通衢有節婦坊新斲石爲之坊極高石柱大書深刻朱字聯云閱清冊數條夏夏乎人所難也披請題幾幅熙熙然衆皆悅之又於某城見武弁署其營門曰柳細風清

黔西州署西偏有海棠一株老幹偃蹇人言花時極香軒亭位置亦佳州牧會稽陶廷淑有聯云名友冠羣芳未知杜老當年何獨無情不詠紅香飄四座若使淵材到此亦應有恨俱消安平道中過蘆荻哨數十家皆土娼其西五里有山象婦人坦



腹下有竅東南有大石如人陽狀向之

黔人用潮銀名吹絲炙以火則鉛出

借短票銀市商謂之銃

黔中婦女作背兜負兒於背每歲中秋夜以少年裝束如女子背瓜鼓吹送至親友牀上祝生子名曰送瓜

省中街市皆砌以石雨後極滑婦女雨行穿毛底鞵或用椶底最穩且快

市人醵銀錢爲會每月籬之團飲爲樂曰上會婦人亦多爲之其始蓋皆各省流寓之民鮮土著者故醵銀寢以成俗輕去其鄉隨地遷異上古淳質之世所不爲也

豬肘呼曰胖

讀胖上聲

煮爛曰色

讀怕平聲

酒一壺曰一棒故呼酒壺曰棒棒

夷人稱漢官曰大老黃吏士曰小老黃黔俗稱人皆曰公老者曰老祖公稱長隨曰二公凡女皆曰婆婦曰奶曰太老者曰老奶老太其尤老者老祖太間稱婦女通曰老太其大公二公三公大婆二婆三婆則依次爲稱小者曰公曰滿至稱女爲妹則賤之矣父母於兒亦不名皆曰大爺二爺以次呼

男婦做客俱取席果糕餌之類包裹攜回曰紮包

凡他省人客黔娶妻生子名轉窩子轉窩所生名門斗子再傳則土人矣轉讀去聲江西人尤多

凡妓所居濫者曰塘子潛藏者曰私門子男女往來者曰做客稱游妓亦曰客俗稱最小者曰么婆幼妓爲小么

塘子多在阜角井三板橋



省城東相寶山樓上有鏡相傳能照前世名照妖鏡余於消夏時過寺見之昏昏不能辨人媼妍其厚二寸許兩面皆有光又有銅牛在佛座下缺一耳亦古物疑二者當合爲一然後可用俗人誤置二處耳

黔靈相寶棲霞諸山並有吳達善劉藻二制軍詩最佳余欲錄歸以行不果

張蓮濤有五禽言其辭一曰昨日雲陰今日雨零昨日山暗今日水深水深猶可泥滑滑愁煞我二曰吁可怖山下路齒齒者石淫淫者霧東西上下無着處不如歸去三曰陂陀陂陀左崖右阿崎嶇逼仄可奈何行不得也哥哥四曰山有草木巢居樂田有稻梁啄不餓得過且過五曰孔雀山雞炫毛自禍我藏其美時至則可吁嗟鳳凰不如我



山陽李宗昉芝齡

包祚永字成美號存齋貴筑南上里陳家寨人自幼穎異力學能文年十四補諸生二十三登賢書雍正五年成進士改庶吉士累官廣東道監察御史性明愨不慕浮華切究民生利弊有意經世之業敦本務實遇事敢言乾隆初楚鹽騰貴官引不銷大臣會議祚永言應照兩粵官運官銷則私鹽可絕而價自平又言滇省銅廠收買正餘銅宜以辨銅庫本餘息銀酌量加其價值以卹厥民又言黔省苗狎頗能白衣其力而漢人惟資楚布歲需千億萬費兵民窮困職此之由請立法勸以紡織並言八旗婦女多工刺繡耗力而無益於用亦宜學習機杼以資生

計又言古州新入版圖諸險要之地建立城汛安設屯軍而竄伏未還之苗甚多深山窮谷畏罪逃刑雖從前猖獗難容其目下困窮可憫多傷失所咸切思歸但聞田土已別經領種村塢多改爲城堡向隅轉壑疑慮不前誠恐異日潰散有虞莫若此時招徠設法近經督臣張廣泗議凡已剿苗寨所有投撫苗衆酌其人口撥給土田歸并安插應再加詳酌務盡招出潛藏餘苗分配各寨漢三苗一俾漢苗雜居強弱相制卽實無土可給亦堪備佃營生撫恩束法自可漸革獷凶以厚藩蔽並言滇省近開麗江普洱昭通東川等府州縣猥夷偏處須調兵防而地廣兵單調多額少督撫提鎮以糧餉歲資協濟而經費有定勢難議添竊思助兵之不足莫如畱心團練素稱精悍夙著勤勞



但團制若循舊而行必事難而累民亦甚惟有變通其法略無  
紛擾妨農不必設衛屯田不必集衆操演諭以保固之要免其  
奔應之繁按州縣戶口多寡每選壯健數百名給予本省優免  
註冊示勸一逢地方有事或令防守隘口或令扞護城池此不  
增饟添兵可期內安外固祇以向來用練或統之武職則遭官  
兵役使弁員虐凌或屬之文官則又爲武職大員所脅制謂當  
慎重其事請於迤東迤西兩道並加兵備職銜以董率之庶得  
文武和衷遵奉惟謹若遇調用出征支糧賞卹概與官兵一例  
如此則與戎政大有裨益疏上議如祚永言七年二月因前任  
貴州提學監察御史鄒一桂條奏清丈黔省田畝逐坵繪形編  
號設由單以給業主立官冊以杜訟端其有丈出餘田祇將原

賦均攤不必加增賦額部議未上祚永具疏爭之其略曰臣黔  
人也備悉民俗丈量一事徒滋擾耳他省且然臣省尤甚奏者  
之意以爲黔田從無頃畝不知歷來頃畝未嘗不清康熙元年  
五年八年皆有開墾畝數報官成賦九年經撫臣佟鳳彩請盡  
行清丈定額升科十一年竣事載入賦役全書是黔省並無不  
丈之田豈得如一桂所云田地但計穀種而無畝數之理且謂  
丈量爲清訟而舉攤賦不增但無知愚民易惑難曉初聞清丈  
已覺倉皇繼見差官尤生畏懼彼窮鄉僻壤之間保無有胥役  
乘機嚇詐倡爲旣丈之後實欲加賦之言因而臨丈之時高下  
任意行跡者將多報少缺賂者以少作多遂致富室勢紳勾稽  
弗確貧民夷戶積算偏精弊竇叢生田畝益混兼有奸猾頭人



串通衙蠹暗折夫馬明索酒殺冊結紙張巧造名目或照煙戶或依田畝逐需挨派共飽私囊再或農隙之時小民趁營生務故於旬日之前追集合村多人行其苛索候丈無期以致廢時失業卽有能員覺察及日久敗露而閭閻受累已深若夫編坵繪形發執由單之說揆之黔省更屬難行夫田界有定坵形非常黔民多貧產業無幾或有兄弟析居將一坵分爲兩三則由單不能各執黔田多依山麓故俗曰梯子田或有夷高培低合數坵而平爲一則又與由單不符其窮民典買或有數坵一單減半轉售則由單又需分給更換繳領民則剝削貲財官亦殫繁案牘又其甚者清丈田畝則通省寸田尺土俱當履隴親勘而全黔上下游沿邊地界接連滇粵湖南半屬生獮生苗冥頑

易駭倍當拊循遽加丈量恐致滋事在一桂謂立法務詳意非不善而臣竊鯁鯁過慮誠見黔省乃刀耕火耨之鄉素稱瘠薄苗蠻雜處當思因地制宜使果田無定畝卽不緣民間爭訟亦必徹底清查若久料畝升科又不得因一二競爭輒至累及通省應令督撫將從前業經丈清現在按則起科者概免丈量其有近年開墾實在未丈之田各令地方官查明轉報以憑清丈分別辦理則黔省民苗感戴萬世矣疏入部議如祚永言從之尋以病乞歸授徒里閭主講貴山書院數年勵諸生以純樸之學家庭謹飭操行如寒素冬戴皮冠舊矣嚮見處以青布綴之臆紙破補以卷牘廢餘其節儉如此年六十有八而卒子必明雍正十三年舉人官武寧知縣曾孫錦榮乾隆五十四年以郡



籍中鄉試第一名錦燦先其兄一年亦以郡籍中式嗣裔多守家學入郡邑庠者祚永卒後所親官奉天歸謂奉天有包御史祠蓋祚永嘗因公辦事其地吏民建以報功德云

張仙一字元元俗名仲猷號三丰又號斗蓬又呼邈邈仙閩縣人又云羊城人廣州志云留侯後裔七歲能碁人無敵者十歲習儒業有小婢饋魚於塾爲同業者棄去而仙不知歸撻婢婢縊遂入山學道遊歙州值歲旱從者死遇二老人遺之餌乃得活乃入番家華林三十年出山渡流沙禮邱長春歸未至閩途遇鄭思遠授以道鄭謂曰一魚之事子必往了俗緣也歸閩補刑曹吏辟囚越獄連坐戍夜郎至平越與千戶張信奕信不勝信忽夢老嫗授子法乃勝仙大笑曰驪山老嫗大饒舌後授信

葬地曰十年後位至封侯旣而果然明史載三丰遼東懿州人名全又名君寶又天順年三丰有自具供狀稱冀州遼陽人遼冀相近閩則遠矣或寄居之地與

明陸燦高真觀禮斗亭碑文曰平越之地因山爲城有老氏之宮曰高真觀據其西南隅在昔仙人張三丰栖遯於斯作亭以禮斗焉先生旣超離人羣還居大清元蹤曰邈遺構遂泯惟先生之道廣大神明形骸外垢天機內朗若夫遐襟曠識卓爾物表雖萬乘傾想躡景追聲而隱見猶龍終莫羈致蓋軒后詘下風之從廣成堅南首之卧未足以喻也當其寓形域中此焉遊息扳揖斗極與相周旋時則斯亭者固靈輿之所降觀百神之所萃集矣而翦焉墜落鞠爲茂草今仙聖臨輓而欻獻龍鶴迴



翔而不下元學之士無以繫其戀慕斯非吾徒之責與燦雖僑  
寄是邦心存高範竚瞻廢址慨然興懷於是屬其觀之黃冠師  
馬崇霞俾經理焉而率諸同志者助其費數月亭成道俗環矚  
咸共歡喜議鐫於亭以示無極迺稽首階前勉爲之銘其辭曰  
嶸峨之山形穹隆兮虬螭結蟠鳳臨江兮扶輿宛延靈淑鍾兮  
言言元宮直崇墉兮亭宇密清樾斗中兮至人天遊此從容兮  
澄心儲精與神通兮清夜雪然星輿降兮魁旋杓回玉衡度兮  
遺墟寂寥厥構仆兮百年於茲復其故兮棟桴高驤芴檝布兮  
神居秘躅燦然覩兮鸞鳥騰告列仙赴兮雲駟電旌紛臞路兮  
元冥在轂黔羸右兮飛廉望舒後先俟兮天樂博衍客倚靡兮  
盤旋遊遨行遲遲兮搗呵山靈時守視兮風雨攸除無阨侈兮  
惟仙日長昊天久兮刻銘斯亭與終始兮

平越守滿洲阿林詠回生桂詩云仙桂扶疏挺石臺孤根拔地  
倚雲栽金枝一樣超凡劫玉斧多應恕散材香滿秋空長不老  
寒生明月靜成胎返魂七寶娑羅樹太息三丰爲汝來禮斗亭  
云五夜朝元禹步停默叅元相合心銘觀空分野星何在度極  
周髀數尙零自有真人歸紫府更餘俗子誦黃庭黔黎百萬皈  
依切頂禮支天一斗亭浴仙池云邈邈埋真莫記年不因離垢  
不知仙呼茶率爾啗煬竈濯足夷然恥盜泉到處傳流風作影  
幾人踏破水中天揭來措大空饒舌滌研何勞白石邊留影壁  
云天外青山山外人虛空留相不留神東來故作飛鳧幻西去  
安知脫屣真橋上灑金猶點石水中撈月已生塵須彌絕頂超



然立兩袖清風萬里身

去平越城西三里山中斷石壁奇峭有張三丰影象戴笠杖策側身西行狀郭青螺題神留宇宙四大字於巖上乾隆五十餘年時忽有廝役某姓者於留宇宙字下斲石作魁字形狀可憎其時官民俱無止其事者污壞靈巖妄作不經亦恨事也

青柳池在高真觀前無名氏有詩云回廊婉轉水雲寒柳絮吹飛春色殘玉笛不聞黃鶴遠何人同倚曲闌干

黔靈山在貴陽城西北三里許有一峰蜿蜒從西北來爲杖鉢峰水潺潺繞山麓爲檀山澗水中峰矗立即黔靈正峰山口有楊柳泉甚清冽又進有天生石橋翠竹掩映過此則宏福寺也寺北一小徑可通樵牧卽大羅木村村前有溪抱山後折而東

轉有岫參天昂藏回首乃獅子巖也巖下有峒洞下有溪皆名檀山自寶塔峰右特起一嶺自南而東綿亘內向與師子巖對峙如雙闕者象王嶺也又其外則師子山昂伏爲案上有雲蓋三臺縹緲天際登象王嶺望貴陽城郭歷歷如指掌山後可眺聖泉

宏福寺爲赤松和尚建和尚名道領浙江人後遷長沙又移蜀中居潼川姓韓父中軒母謝氏和尚生而好佛不苟暈飲酒明末避亂至黔爲杜氏後棄儒業投靈藥和尚剃爲僧遊滇蜀歸遂闢黔靈山爲祖師云

古州同知毛振翮秋日登黔靈山寺留贈參之上人詩云石磴紆回到上方開軒風露撲衣涼白雲冉冉藏僧閣黃葉紛紛墜



佛牀身卧靈山觀自在心馳碧落笑奔忙蒲團坐話非容易況  
復高僧是故鄉說法臺前花雨迷遠公一話夕陽西題詩未敢  
誇蓮社送客還看過虎溪清磬數聲空谷杳紅塵十丈下方低  
逃禪不覺歸來晚滿逕松陰襯馬蹄登拱南閣再題贈參上人  
云雲樹蒼茫望渺然凭欄秋思滿江天孤松幹老多巢鶴衰柳  
枝殘不挂煙日送飛鴻懷往事人臨逝水悵流年桂花開盡黃  
花放纔得偷閒一扣禪芳杜洲前草色齊萬山飛翠日沉西觀  
風臺上蕭蕭葉丞相祠邊喔喔雞少女澣衣秋水碧牧童收犢  
暮雲低坐來詩思清如洗短紙重張筆再題

銅仁舉人楊光燾登黔靈山訪赤松師不值詩云歷盡巔岈路  
危梯挂石闌凌空人似鶴望遠市如盤雲掩孤扉迴風高六月  
寒謾須尋勝跡緩步已蹒跚不圖霄漢外屢結涌珠宮軒翥森  
高下盤旋入窅濛雨餘芳草綠霞落碧厓紅坐覺塵機息悠然  
憶遠公自來峰頂上石逕總矜落落松千個離離花滿庭雲  
歸僧舍碧煙靄佛頭青想像天台路奇觀殊未經不盡看山興  
遲遲日已斜清香餘茗椀佳味飽胡麻院寂猱升木庭空鳥啄  
花主人歸路晚明月照袈裟

黔中多黃果樹卽柑也

田山蘊過平越倒馬坡坡半見隔山石壁仙人影儼然圖畫作  
歌曰神仙之說果有無幾見員嶠兼方壺風蟬脫骨幻術耳逃  
名欺世誇清都劉安雞犬事頗怪錢鏗年紀言多誣漢武不識  
東方朔祀竈卻老何其愚人生百年五倫重學仙信佛皆僇夫



草木瘴癘山水窟其間或有煙霞徒熊經鳥伸訣自秘寸田尺宅理豈麤地產丹砂大於斗彭亨鼎大鉛汞腴異哉三丰僿佗侶邈邊道士羣相呼洪武初載來黔地巉峨城市吹都盧石鉢洗泉清且旨廟砌老桂榮不枯郭外層嵐立千仞忽於巔頂傳形軀勾展顧吳作小照儼然一幅行仙圖華陽笠子兩芒屨手拖藤杖西方趨飛瀑直衝入袍袖松花下落黏髭鬚憑虛御風將焉往何不爲我停須臾神留宇宙四大字筆法倒薤非模糊誰人結構置峭壁巧匠斲削驚天吳始信靈蹤非妄誕徘徊不去坐日晡長生思假六禽戲前村微雨鳴鷓鴣

平越城南三里仙人影厓前地名武勝關有橋每夜有微雨灑之橋常溼土人呼爲夜雨灑金橋

犀牛洞在平越城外月山之北高真觀南內有石牛明正德間高真觀有鐘夜出與牛鬪如雷吼早起視之鐘上皆水草

平越西南五里許有仙人洞余自平越回省之日冒雨往尋在山半徑仄且滑至洞則豁然開朗如萬間大廈其西畔別一門曲且深入其中又一洞然炬視之其上若屋然水點滴落石池中  
中有聲酌以烹茶味甚甘僧構木於巖間爲小榭下臨絕澗水聲如萬馬奔騰境殊奇絕西畔又一門入極暗上出僅容一人側身仰出忽見明則其上有一小圓穴窺見千仞峭壁下俯急湍亦奇觀也

遵義西門外山頗秀潤渡河至山麓爲桃源洞其上有謫仙樓相傳李太白流夜郎曾至此郡守趙君遵律建樓又以太白有



白田聽鶯詩而山下有村名白田因以爲太白聽鶯處謫仙者顧晴芬前輩督學黔中時所命名也今典史陳名丙者天長人亦能詩著有什一集復鳩衆於樓之左右循山麓構軒亭十餘處丹雘紅樹重閣飛甍映於翠微煙靄中頗具勝概

黔中丞尉中有三風雅人一遵義縣典史陳丙號吉甫卽著什一詩者一大定府經歷董遠號瑜薌華亭人文敏六世孫善書畫詩宗儲王頗新雅今署貴陽府經歷一黃平州吏目李炤祿字申之號乙閣江陵優貢生亦能詩事繼母至孝搜輯飛雲洞詩文爲一編名靈巖小志近又爲獲安生員傅玉書刻黔風集黔風者傅生採錄黔中詩合爲一編其書未成余未之見也余試大定遵義時董與陳爲巡捕官皆勤敏黃平則往來驛路所

經李申之來謁恂恂讀書人下僚中豈無賢者患不能知而用之耳

董瑜薌有和余贈沈蘋濱詩其序云嘉慶甲戌仲夏芝齡學使試士大定遠承乏郡參軍晨夕趨陪侍從雅蒙禮遇秋半調貴陽逢公內遷大司成將治裝北行奉獻一章以證知己之感不專贈行也時公有贈蘋濱詩卽用元韻云夜郎地遠五溪水唐有寓賢供奉李越千餘年逢吾公江東獨秀真才子手持使節來一年邊土文風蔚然起鄙人幼學荒三冬束髮畏見名儒宗秋風十載傷毘毘饑驅出門愁滿胸南北奔馳寒復暑名流許我披雲覩儒生爲貧甘折腰一官來聽漏天雨羅甸城邊山瘴深四月五月如秋陰熟梅風裏輶軒到窮巖大壑龍虎吟耿耿



文光燭霄顛持衡力挽狂瀾倒蠻府參軍趨下風公之接余不  
草草建康山色蔣侯祠故鄉遊迹曾題詩是時凡鳥奮雙翼思  
與鳳凰頡頏之公當快意達失意華林未共神仙醉荒陬相見  
隔雲泥回首當年汗浹背憐才彷彿信陵君一月欣陪大雅羣  
秋半會城重謁見朝朝思近叢蘭芬遠不負丞丞余負卑官落  
拓誰爲友黔山忽返使星輶歌驪忍勸郵亭酒瑜薊又示余過  
畢節威寧途中詩七星關云馬首南荒外蛇盤石壁間地周八  
蠻洞天近七星山蜀漢風雲氣祠堂虎豹關徘徊禡祭處夕景  
照孱顏當年濟濟火卽此効前驅龍卧留壇宇雲高化陣圖同  
槽三馬戀諸葛百蠻呼想見南征日星文射魏都三道水云鹽  
井空騷馬鉛山亦汗牛如何三道水不濟一行舟野馬川云兩

地均烏撒中分野馬川湍流赴沙草客路與洄沿箐古時窺日  
雲游易障天行行三十里何處有炊煙七家灣云枳籬竹瓦屋  
三間迴合清淪倚半山搯枕山牕一夜雨曉來水漫七家灣七  
家門外一灣平有客山行復水行忽漫泥輻石上過怪來一路  
只磴磴瓦甸云瓦甸原無漏其如客路遙聊停啜杯茗莫悵雨  
瀟瀟渾水塘云借問水何渾其端不在水川澤能納污澄之斯  
見底石牛口云回看野馬川忽入石牛口前世龍門公今生牛  
馬走石板房云尋山不知遠活石化爲板一板兩板縱復橫重  
之百板魚鱗生板板雲連瞰天庭差少琉璃布地平長文弗下  
拜茂灌爭知愛海嶽與華林古情隔幾代此邦石數恒河沙不  
點黃金卽作家多錢善賈長袖舞聚族於斯館行旅莫訝天無



三日晴古來幾費神鳩補杜鵑花云野花零亂草蒙茸幽艷從

看血淚中底事多情生鬼國殘春猶染徧山紅土人以杜鵑為徧山紅金

絲桃一名過路黃云蓓蕾初生瘴雨寒未花蹊畔已無言春來斗覺

黔山富拋擲黃金過路看桐花云簇簇桐花受露濃最嫌掠蕊

是胡蜂寄聲五色桐花鳳莫惜西川萬里蹤大定往蜀道余未

之見也都錄其詩以備考證

因錄鄴芸瑜薊和余贈蘋濱詩並錄蘋濱和章平生奇癖耽山

水萬里牂牁歇行李聱牙蠻語詩一囊逢人敢自誇才子李徵

君文飛將軍角逐難言翦與起謂鄴芸輜軒隣隣來前冬隴西鉅

儒風雅宗如圭之品如椽筆光芒衆宿羅心胸玉尺衡文歷寒

暑株穢刪除蘭芷覩入幕者誰乃徵君公之今雨吾舊雨古槐

夾道試院深樛材難傍桃李陰故人袖詩作羔雁之黔留黔長

短吟風雨連朝送西顛旅館閉門傷潦倒蕭蕭鬢白布袍青遠

志在山亦小草浮玉橋通丞相祠一過再過嬾賦詩入秋後會兩過城南

丞相祠別有好山人夢寐足未着屐心先之貽我一篇慰我意公

瑾醇醪令人醉先標詩品後招游字字麻姑爬癢背買絲欲繡

平原君折節下交今無羣國士之感從隗始夜郎衆口揚清芬

登臨有約肯相負公是名師徵君友黔山權當子雲亭從遊願

載侯芭酒

遵義蠶事最勤其絲行楚蜀閩滇諸省村落多種柘樹繭客至

春時買其樹放蠶於上繭成來收取之廣東程鄉繭亦遵義絲

也居民無男婦大小手中皆持一撚絲墜子余莅郡時見執事



役伺應之暇就懷中取木墜子撚絲不輟可云勤矣  
遵義貴陽以烏江爲界烏江之西山色秀潤樹木蔥籠過江則  
皆童阜多臃腫狀一水之隔而風景迥殊烏江上名大王坡其  
假借極可笑又有黑神廟余有聯云省曰黔省江曰烏江神曰  
黑神緣何地盡南天却占了北方正色無能對之者  
鎮遠澗水流爲沅江諸山谿水多會之東北二十餘里有一溪  
名潮水溪其水獨濁相傳發源處有伏犀焉

牟珠洞在貴定縣西十五里大道傍洞口爲石門上有古松一  
株門內有觀音蓮座石乳所凝也其上一圓洞透天光再入則  
必攜炬火有石鐘石鼓亦鐘乳垂結輪囷如象鼻擊之其聲類  
金草也又有羅漢像在巖下如僧寺所塑尊者其他石佛石魚  
因形似而命名者不可悉記又有千頃田則平地似方罫石骨  
隆起如陌阡然傳聞此洞可通人行百餘里詢諸寺僧則云中  
有水不可行矣

華巖洞在施秉東北二十五里洞口懸厓刻西時飛來四大字  
洞中亦有羅漢像燃炬入上如屋水點滴四散滑不可行其通  
人處亦可二十餘里遊者罕能窮其境耳

遵義縣署有方池池水綠色其旁石穴中有巨蟒時或見之府  
署有綠蛙長二尺大如斗

安順參將署後有井其水煮飯白米皆成紅色如晚稻

威寧州有泉從地出磬石爲池其泉自泥沙中湧出如貫珠池  
中凡十數處終日沸起俗呼爲葡萄泉



飛雲洞有宋芷灣

湘

題詩有句云一般九月秋黃葉兩度三年

人白頭葢芷灣會典試黔中復以京察出為雲南守故言之慨

然樊城旅店又見其題壁五詩悲歌慷慨經南陽荒敝後不覺

聲淚俱下矣詩曰十日河南路年荒不忍看青苗收稿易黃土

葬人難

苗或抽條而稿或抱穗而稿皆刈作芻秣道殣不絕可傷

不雨自何日有田同一歎

草根能幾許過客亦登盤三十萬糧賑饑民殊未知君恩如此

厚漕運到何遲盡室驅兒女隨風轉路歧馬頭南北望無過是

流移亦知死不遠且自望生逃道路無人哭春犁有夢操乞錢

憑婦見得餅止兒號恨少神仙術多金散汝曹昨過古昆陽連

村夜劫糧平時春社肉今日虎牙羊

舊縣地方三日內搶人村莊矣

此輩原拚

盡為官何策長

時邑宰方率領而出

天河無限水安得化成漿保富談何

黔記卷二

三

易原貧法亦難古來惟積貯大地不波瀾帝德同天大民流歎

海寬監門圖一幅誰奏九重看時癸酉七月十六日也兩閱月

遂有滑縣之事旅行見此能無愴然



黔記卷三

山陽李宗昉芝齡

猓羅本盧鹿在大定府屬有黑白二種黑者爲大姓其人深目長身黑面鈎鼻雍髭留髯其俗尙鬼又名黑鬼造堅甲利刃鏢鎗勁弩蓄良馬好射習擊刺其兵爲諸蠻魁

羅鬼女官卽猓羅正妻稱曰耐德編髮爲髻用青帕蒙之多以銀絲花貼額耳垂大環拖長裙三十六幅子年幼不能主事卽耐德爲女官代理所部

白猓羅在大定安順二屬

宋家苗在貴陽安順二屬男耕女織今多讀書入泮者

蔡家苗在貴筑修文清鎮威寧平遠等州縣俗翁媳不通言居喪三日不食稻肉惟餒稗粥夫死以婦殉葬婦家奪去乃免

黔記卷三

一

卡九狝家在貴陽安順興義平越都勻等府穿青布短衣婦女以花帕蒙首衣短而下圓嚴寒盛暑衣無添換長裙細摺勾雲合角中以顏色相間以六月六日爲大節每歲孟春聚會未婚男女於野外跳月歌舞彩帶結球拋而接之謂之花球意旣洽彼此互擲遂私焉凡祭祀貧者用牛一富者數牛親戚族友各攜雞酒致祭遶牛而哭祭畢屠牛分肉食畢而散

菠籠狝家一作普籠又作補籠在貴陽定番廣順二州安順興義二府以十二月朔爲大節相傳武侯南征時所遺銅鼓若掘地得之擊以爲歡富者常以重價爭購喪則屠牛招戚友以牛角歡飲孝子不食肉惟啖魚蝦故祭亦必用之葬者以傘蓋墓



期年後始焚之其性慄悍出入必帶利刃倘有睚眦之仇必報  
近今禁戒漸循禮法矣

青狎家在古州清江丹江等處以青布蒙首穿青衣女子色白  
而敏工織繡善奕棋以擲球爲樂所私者曰馬郎夜則與之飲  
父母知而不禁惟避其兄弟婚姻苟合愛者以牛酒致聘不知  
正朔文字以木刻爲信田山蘊黔書但載狎家未分卡九篋籠  
青三種也

曾竹

黔書作會竹

龍家

黔書云龍家有四在康佐會竹者爲狗耳

在安順府屬婦女穿白

衣繫桶裙戴細布方巾以髦札一尾名曰髮尾用豬油塗之遇  
親戚喜慶則負酒牽羊并隨帶新衣數襲以誇其富死則殮煨  
骨而葬每七月七日祭奠先塋

狗耳龍家在安順大定二府及廣順州之康佐司有之男子以  
布蒙首婦人辮髮以布束結於頂餘布旁結兩指如狗耳狀黔  
書云男女旋躍而擇對奔則女氏之黨以牛馬贖之者今亦知  
通媒致聘矣

馬蹬龍家

黔書云一日大頭龍家

在鎮寧之谷西堡頂營司之間以耕種

爲業

大頭龍家鎮寧普定有之男子戴竹笠婦人衣土色衣繫青短  
裙斂馬鬣於髮髻如蓋男女勤耕力作

花苗在貴陽大定安順遵義屬皆無姓氏其性憨而畏法其俗  
陋而力勤衣用敗布緝條織成青白相間無領袖黔書載其跳  
月事最詳今亦知用媒妁惟婚娶必男至女家成親越宿而歸



仍舊俗云

紅苗在銅仁府屬

白苗在龍里貴定黔西等屬衣白衣男子蓬頭赤足婦女盤髻長簪祀祖之先必擇一肥壯牯牛頭角正者飼之乃聚闔寨之牛鬥於野勝則吉卽卜祭期屠之主祭者白衣青套細摺長裙祭畢合親族歌飲爲歡

青苗在黔西鎮寧及修文貴筑等處黔書稱其强悍好鬪今則馴良在平遠者又名箐苗

黑苗在都勻八寨丹江鎮遠黎平清江古州等處族類甚衆習俗各殊衣皆尙黑男女俱跣足陟岡巒披荆棘其捷如猿性悍好鬪頭插白翎出入必攜鏢鎗藥弩環刀自雍正十三年勦後

凶性已斂孟春各寨擇地爲場跳月不拘老幼以竹爲笙人死則生前所私者以色線繫竹竿插於墳前男女拜祭

翦髮犴猪在貴定施秉黃平州屬

東苗在貴筑修文龍里清鎮及廣順各屬有族無姓婦人衣花衣無袖惟兩幅遮前後穿細摺短裙男子蓄頂髮短衣背褶中秋合寨迎鬼師以祭祖及族屬故者屠牛陳饌以次呼鬼名祭畢集親族暢飲竟夜每春獵於山所獲禽鳥必薦其祖先守法畏官循禮服役

西苗有馬謝何羅雷等姓在貴陽平越二府新娶必別寢私通孕產後乃同室秋收時卽合衆牛於野延善歌祝者披大寬氊衣腰間周圍細摺戴氊帽著皮鞞尊者在前童男女著青衣彩



帶百人歌舞吹笙隨之歷三晝夜屠牛以賽豐年名曰祭白虎性情樸實畏法不訟

天苗在平越多姬姓性情柔順婦人工織善染以仲冬朔日爲節其在陳蒙爛土壩者俗詳黔書按平越草志云天苗周之後

裔志作以冬至日爲年節

獾苗在貞豐羅斛冊亨等處原隸廣西雍正五年改轄黔省勤耕力作薙髮服飾俱如漢人惟婦人蒙髮短衣長裙仍苗裝也打牙狃狃在黔西平越清鎮屬髮梳前披取齊眉之意

豬屎狃狃在石阡黎平古州平遠清平等處極臭穢出入佩刀弩有讐必報若獨力不能行則備牛酒以款有力者鬪死則納牛償之

紅狃狃在廣順平遠清平等處

花狃狃又名狃兜苗在施秉龍泉及黃平等處男子懶耕作好獵逐鹿羅雀爲事婦女兩袖綉五彩周身飾以蠶繭綵綵如貫珠

水狃狃亦名狃兜苗在施秉餘慶等屬善捕魚隆冬猶入深淵不畏冷男子衣服同漢人婦人細摺長裙婚姻喪祭俱循漢禮知法畏官

鍋圈狃狃在平遠州男子自織斜紋布爲衣婦人青帕籠髮名爲鍋圈衣青衣短裙男子有病不服藥用虎骨一具上纏五色絲線置簸箕內延鬼師禱之性好酒惰於農事

土人各處有之性好鬪今亦漸淳



披袍犵狁在黃平州男女衣外披一袍前短後長鑿竅爲桶裙羊毛織成性純謹勤耕作多傭鐵工者又或以種梨爲生狝犍苗有王黎金文等姓散居各府縣冬則掘地爲鑪卧牛羊皮席無衾褥遇時節以草札龍船上插五色紙旗於郊外歌舞祭鬼爲歡在清平都勻者衣服與漢人同親死用長子居喪七七之內不沐浴不踰戶如長子貧或以長孫次子代之遵師教多有入泮者

犵狁苗在荔波縣男子善耕作婦人工紡織短衣短裙僅以遮膝親死不棺反歌唱鑲木板殮而停之及葬子女哭必出血守墳三日而還

僂人在普安廳各營司性淳佞佛凡猓羅狝家等苗言語不相

諳者常賴僂人通之

蠻人在新添丹江二處男子披草蓑婦人青衣花布短裙喪葬殺牛歌舞性獷悍愛漁獵以十月晦日爲大節祭鬼黔書作朔日在

思南府之沿河司者俗亦同

洞人皆在下游而洪州尤衆性多猜忌夫婦出入必偶冬採蘆花禦寒

猓人黔舊無之雍正時自廣西遷來清平貴定獨山等處居無定址喜傍溪澗以樹皮爲連筒灌水至家懶於汲也耕作之暇入山採藥沿寨行醫所祀之神名曰槃發所藏之書名曰旁輒圓印篆文義不可解且珍秘之風俗謹厚見遺不拾

楊保苗在遵義龍里二屬性多狡獷抗官司差拘而遵鄉老約



束

狎獷苗在都勻黎平石阡及施秉龍里餘慶龍泉等處有楊張石歐等姓

九股苗在興隆凱里黑苗類也此種武侯征滅之僅留九人故名地廣族繁散處蔓延性多悍頭戴鐵盔前有護面後無遮肩身披鐵甲及臍下鐵鍊圍身鐵皮纏腿左手持木牌右手持鐵鏢口銜利刃行走如飛三人共弩名曰偏架自雍正十年撫剿搜繳甲兵建城安汛至今風稍戢矣

八番苗在定番州其俗勤男日出而耕女日入而織穫稻則剗木臨流作白水自推而舂之以十月晦日爲大節黔書作十月望日爲歲首親死夜靜出葬曰不使吾親知之

紫薑苗在黃平清平丹江等處與獨山州之九名九姓苗同類輕生好鬥遇讐者輒生啖其肉有在平越州者多出入行伍大力善戰及讀書應試見之多不識爲苗者

谷蘭苗在定番州屬男耕女織所織布最精細諺云欲作汗衫褲須得谷蘭布婚姻用媒妁

陽洞羅漢苗在黎平府屬男子耕作貿易女人鬢髮散綰插木梳於額上富者以金銀作連環耳墜長裙短褲或有裙無褲好潔身常洗髮沃苗類之最近人情者

克孟牯羊苗在廣順州之金筑司耕作不用牛用鐵鎛代犁耨而不芸男女躡笙而偶生子免懷後始歸財禮親死不哭反笑舞浩歌謂之鬪屍次年聞杜鵑聲則舉家哀哭曰鳥猶時至親



不復來

洞苗在天柱錦屏二屬擇平坦近水地居之種棉花爲業男子衣與漢人同多與漢人傭工女人帶藍布角巾穿花邊衣裙所織洞帕頗精通漢語聽約束

箐苗居山箐在平遠州屬種山糧爲食男女衣服均自織

矜家苗在荔波縣十月晦日祭鬼爲節男女均以藍花帕蒙首未婚者其帕稍長每仲冬男女相聚歌舞所歡者約而奔之及生子後方歸母家名曰回親始用媒妁通聘

洞家苗在荔波縣衣長不過膝每歲首雜魚肉酒飯聚盤瓢擇居近水善種棉女自紡織男子雖通漢語不識文字以木刻爲信

水家苗在荔波縣自雍正十年由廣西撥隸黔之都勻府屬男子好漁獵婦人勤紡織有水家布之名桶裙短衣四圍俱以花布綴之每歲首男女成羣連袂歌舞相歡者遂爲婚姻

六額子在大定威寧二屬有黑白二種結尖頂髻婦女長衣無裙親死時殮之葬亦用棺歲暮卜之吉則延親族至墓前以牲酒致祭發墓開棺取枯骨刷洗以白爲度用布裹骨復埋過一二年仍取骨而洗之七次爲止遇家人有病則曰祖先之骨不潔仍取骨再洗所謂洗骨苗是也近今禁戒漸止

白額子在貞豐羅斛二屬男子梳尖頂髻如螺女長衣無裙其俗與六額子同但祝鬼而不洗骨

冉家蠻在思南府之沿河司好漁獵俗與蠻人同



九名九姓苗在獨山州州屬性狡而悍每多假捏名姓喪葬婚  
事殺牛聚飲醉必相鬪輒及干戈受傷者納牛以講和婦女以  
種山爲業俗與紫薑苗同

翁頭苗在古州下游亦多有之與洞崽同類皆黑苗也性喜戰  
好鬪耕以鐵犁人力爲之不用牛每歲冬月朔日爲大節婦人  
習俗編髮爲髻近多銀系扇樣冠用琵琶長簪綰之耳墜雙環  
項圈數圍衣短衣以五色錦鑲邊姑之女必適舅之子聘禮不  
能措則取償於子孫倘外氏無相當子孫抑或無子姑有女必  
重賂於舅謂之外甥錢其女方許別配若無錢賄賂於舅者終  
身不敢嫁也

洞崽苗在古州先代以同羣同類分爲二寨居大寨爲翁頭小  
寨爲洞崽洞崽每聽翁頭使喚婚姻各分寨類若小寨私與大  
寨結婚謂之犯上各大寨知之則聚黨類盡奪其產或傷命其  
俗善舟楫

八寨黑苗在都勻府屬性獷悍女子以色布鑲衣胸前錦繡一  
方護之謂之遮肚各寨野外均造一房名曰馬郎房未婚之女  
晚來相聚其所歡悅者以牛酒致聘出嫁三日卽歸母家或一  
年半載外氏向婿索頭錢倘婿無力措辦則將女改適有婿女  
皆死者向其子索之名曰鬼頭錢

清江黑苗男子以布束髮頂帶銀圈大環耳墜着寬褲男女皆  
跣足種樹木與漢人通商往來稱曰同年愛着戲箱錦袍漢人  
多買舊袍賣與之以獲倍利未婚男子稱曰羅漢女子曰老倍



春日晴和攜酒食於高岡男歌女和相悅者以牛角盛酒歡飲奔而苟合男子生子後乃曰有後人方事耕作也

樓居黑苗在八寨丹江男子耕種性剛而憨婦人以羊角縮髻愛居高樓人死殮而停之爲期合寨共卜吉以百棺同葬公建祖祠名曰鬼堂其地什物毫不敢犯犯之以爲不祥性最信鬼愛養牲畜人居樓上畜養樓下

黑山苗在台拱古州清江三屬以藍布束髮居深山窮谷不事耕作每以擄劫致富能卜茅草卦預知吉凶今安戢矣

黑生苗在清江屬性凶惡訪富戶所居則鈎連惡黨明火執杖劫而奪之自雍正十三年改漢人服今亦守法

高坡苗在平遠黔西等處着黑衣喜種山林婦女以木板尺許縮髮內故又名頂板苗婚姻苟合男婦善染力耕作勤紡織平伐苗在貴定之新添營

黑狎家在清江屬廣植樹木爲業其寨多富與漢人往來熟識可央隣近富戶作保出樹木爲本合夥生理或借貸經商無不應付倘不能償不妨直告其故卽致虧折可再添借倘被人掣騙又不能出外追討則訪原保祖墳掘取骸骨而去謂之捉白放黑又謂扯白罵黑使原保之子孫拘查掣騙之人追借項贖取骨骸所有隣近墳墓常受其害今設以保甲此風息矣

清江狎家台拱有之婦人耕勤男子頭纏紅布腰佩大刀聚黨出寨捉拏過路孤客將長木爲枷進寨內索取財物名曰贖身錢如不給者終不能脫多受害者近今嚴懲畏法者不敢爲



也

里民子在貴陽黔西大定清鎮等處男子多貿易婦女穿細耳草鞵勤儉耕作閒時則紡毛布作衣愛養牲畜常帶入山作活每歲節與漢人同

白兒子在威寧及滇省有之各有宗族男子多漢人風女人猶苗俗漢人多贅苗女爲家生子後仍歸漢者故名白兒子也

白龍家在大定平遠二處衣白衣入山採漆售於市凡物皆背負婚喪頗循漢禮

白狝家在荔波縣男子頭戴狐尾以耕種爲業女子身小而多慧穿淡藍色衣細摺勾雲裙紅綉花鞵脛帶銀圈五色布褲每孟春擇平壩豎大木一空其中名曰巴槽男子各執竹片擊巴

槽其聲響似鼓名曰打罽又曰同耍凡同耍男女抱罽相戲父母在旁觀之以爲樂有漢人通苗語者亦與焉未婚苗女故多與漢人往來名曰外郎俟女正配有夫酌以苗布一二疋謂曰斷郎禮卽不得再往

土犴猪在威寧州男子披草爲衣專與猓羅雇工每日用油燒熱捺足故入山如猿猴

鴉雀苗在貴陽屬女子以白布鑲胸袖裙邊最喜居山種糧爲食親死擇高山爲佳壤其言語似雀聲故名鴉雀苗也有事時在官惟聽鄉老之言

葫蘆苗在定番羅斛二處性凶暴連羣聚黨專以搶劫爲業不事耕作今以法嚴亦守分矣



洪州苗在黎平男子與漢人同勤耕力作女子善紡織棉葛布頗精細多售於市故有洪州葛布之名

西溪苗在天柱縣屬女子短裙不過膝以青布纏腰未婚男女攜盃相聚而戲愛者約於野歌舞苟合生子後以牛過聘焉

車寨苗在古州男多藝業女工針指未婚者於曠野爲月場男絃女歌聲最清美與諸苗不同相悅者自爲配合亦名跳月此種乃馬三寶之兵敗落六百名聚此贅苗家故有六百戶之稱生苗在台拱凱里黃平施秉等處多野性所食喜生物卽魚肉亦以微熟爲鮮美故名

黑脚苗在清江台拱地方男子短衣大褲頭插白翎出入三五成羣持鏢帶刀以搶劫爲能凡作事以二螺螄置盆中觀其相鬪以下吉凶每多應驗呼曰軍師婦人夫死不能再嫁如男不行搶劫者有女則不嫁之今亦知畏法矣

黑樓苗在古州清江八寨等屬隣近諸寨共於高坦處造一樓高數層名聚堂用一木竿長數丈空其中以懸於頂名長鼓凡有不平之事卽登樓擊之各寨相聞俱帶長鏢利刃齊至樓下聽寨長判之有事之家備牛待之如無事而擊鼓及有事擊鼓不到者罰牛一隻以充公用

短裙苗在都勻八寨男子短衣寬褲婦人衣短無衿袖前不護肚後不遮腰不穿褲其裙長只五寸許極厚而細摺聊以蔽羞採紫草以營生性嗜酒醉則常卧山凹隆冬浴於溪澗且云可以助暖



尖頂苗在貴陽府屬男女梳尖頂髻每仲冬朔日爲大節夫婦耦耕力作

郎慈苗在威寧州屬其俗更異婦人產子必夫守房不踰門戶彌月乃出產婦則出入耕作措飲食以供夫乳兒外日無暇刻父母將死俟氣初絕時將首扭向背後謂曰好看後人今則此俗漸改矣

羅漢苗在八寨丹江男子戴狐尾披髮於後最敬彌勒佛每三月三日男女攜食物供佛歌舞三日不食煙火似有寒食禁火之意

六洞夷人在黎平府屬短衣色裙細花尖鞵未婚男女翦衣換帶爲憑卜吉嫁之隣近女子執藍布傘往送名曰送親連袂歌

舞至男家飲唱三晝夜攜新婦同歸母家新郎每夜潛入婦家與婦同宿及生子後方過聘而歸夫家母家以苗布數疋爲嫁資女則紡織勤勞男亦多讀書識字者喪葬禮悉與漢同

八十二種苗圖并說原任八寨理苗同知陳浩所作聞有板刻存藩署今無存矣田山蘊黔書舊有三十種茲圖說較山蘊爲詳惜其言不雅馴擬暇時再爲潤飾成文

凡山蘊書所已詳者俱紀其名語不具錄

苗婦畜蠱者多得財蠱多必須嫁之或月一嫁焉不知者往往於山僻小徑拾得金錢衣包之類取之歸而蠱亦隨至至家則朝夕供奉稍不厭其欲必爲害甚有破家亡身者秋間苗婦攜布袋買刺梨與小兒食多中蠱者久爲羣兒識破賣時先呼而問曰中有蠱否答曰無則不爲害矣狎家子畜者尤多



黔俗家有病者婦人以米置雞子於上蹲門而禳之名曰叫魂不愈則召端公祈禱端公亦道士類作法與演劇相似衣服亦號行頭且有選少年作女裝爲神仙者觀者若狂殆亦巫覡之遺風歟

黔人婚娶新婦至卽拜堂新郎卽往謝妻父母三日新婦母來看視滿月回門夫婦同在外家宿

余自黔回京壬戌同年涇縣朱蘭坡學士琦見所記黔中志乘草藁題以長篇且送余視學浙中閱二十年蘭坡掌教吳門以所刻小萬卷齋詩集郵示余重見是詩不第作今昔之感其詩亦足爲黔生色也錄於記中者非以題茲記重也爲黔故錄之也詩云太史陳詩古有訓觀風往往輜軒乘隨時載筆博尋訪

留傳後代爲明徵牂牁舊域極荒遠欲據簡籍嗟難憑蒙齋先生近持節原註田侍郎斐著錄乃以黔書稱細及禽魚鉅疆里羈縻藉可擊長繩其中閱歷各殊異豈尠聞見堪加增星槎到處易攜取淮陰學士當年曾無多卷帙辭創獲試校志乘非因仍苗獍種列八十二像繪較若分淄澠圖功救安念尤篤守吏莫漫荆舒懲馴安故俗迹使易何妨尺土皆峻嶒駢駢六郡卽蒙

召惜未歷遍微盧烝茲冊收藏亦珍物補苴且俟他人承平生撰述不擇地朗抱又鑑漸江激從昔越中號才藪借資領袖君其勝搜文考獻倘關意譬彼鱣鯉胥歸習羣雅左右供驅使倏看竹素盈行勝陳編媿我久跼伏斥鷃那敢追搏鵬聲名官職奚所羨合任下上如風鐙顧惟孤懷獨傾注山水嗜已成癡癥



快君此去清賞得隄近白傅臺嚴陵偏於恹憊覓閒暇策杖猶  
砍天台藤榻來捃採宜倍富吉金樂石拳拳鷹鴻蹤卻憶灑陽  
岸竟等晉楚卑邾滕車笠宿盟幸勿忘寄郵先付鈔胥膳一篇  
跋尾兼敘別長勺再鼓吾差能

蘭坡又題余所繪黔苗圖詩曰洞庭彭蠡間古苗多根蟠三危  
旣丕敘地合隣洩桓胡爲逮後世窟穴仍叢攢當由竄其君蒞  
戶原未殫久之遂滋衍宅田粗能完牂牁種逾繁散若星羅盤  
遺兵六百人乃以他族攔漸成鬼方俗荒陋侔獯豸正朔渺率  
遵蠢彼猴而冠跣足躡芒屨趨捷升噴吮於中別生熟畢竟榛  
殊蘭大都寡恩情親死昧置棺舉口焚諸野歌唱相追歡枯蛻  
卽埋瘞恒出除垢癩祭豐亦椎牛屠肉供饗餐迨夫葬子女鵲

血偏汎瀾豈誠天真漓顛越吁可歎馬郎事尤醜絲草私聯繫  
跳月樂吹笙誰克懲姪奸惟宋家蔡家聊作翹楚看居喪飯稗  
粥泮水榮袍襴餘者頗力耕倉廩新禾穰谷藺織賣布青狎繡  
齊紈始知同食息拊循良非難斤斧毋遽持輕擊髀與體衣柳  
但防患庶免踰冒繇前明神熹時構禍開楊應安邦焯熄幾何  
年果否忱輸丹

昭代極光被西域邊疆寬況此猶腹內奠定應如磐乾隆歲旃  
蒙妄爾羣揭竿吾宗有英傑謂慶錦公入陣披忠肝鴉西寨殞身迄  
今垂悲酸

廟謨靖紛淆崩角皆壺箎將永弭厥釁勗哉親民官柔惠宜使  
懷井廛勿凋殘德威宜使畏文網勿扞干守土嚴且靜澤浹心



終寒熙熙春臺登那致湯沸涓慕思似蜀相銅鼓聲留誰君昔  
駕輅車若曹曾負簡採風徧蠻鄉囊筆隨吟鞍魁形並詭習一  
一歸雕剡譬益緝山經目睹無夸謾動念關

國計飛鴉變翔鸞盍當職貢圖拜手呈

朝端他日著勳業名足參范韓繁余苦株待幸獲從旁觀繙筴  
重推詳塗履痕初乾奮焉壯志起遐壤封泥丸



黔記卷四

山陽李宗昉芝齡

順治十五年孫可望李定國治兵相攻可望降吳三桂自四川

進兵貴州四月克遵義五月入貴州糧乏兵疲還軍熄烽熄烽距省

百三十里屬修文縣與開州倒流水相去甚近敗總兵梁亦英於開州倒流水六月水

西今黔西州宣慰司安坤蘭州宣慰司奢保受降七月還遵義定國

部將白文選以三桂退保重慶遂自七星關進營生界窺遵義

十月大兵分三路既集戒期入滇定國以西路已有白文選乃

令初三昇出中路壁雞公背而出東路扼黃草壩十一月三桂

還遵義進兵白文選退保七星關十二月三桂敗文選兵關地

險峻前臨麻哈江兩岸石壁陡峭僅一小木橋可度其南岸石

黔記卷四

城木柵遍排巨礮積糧以守三桂知其險不可攻乃由水西至

西溪河得捷徑至以烈凌晨渡關下流之天生橋抄出文選背

文選兵驚潰至烏撒今威寧州可渡河入滇之道定國將馬寶後降三桂守可渡

河文選敗走寶與俱奔時定國軍盤江永寧州地江水流入廣西毗連江城泗城

土官岑繼祿導大兵入定國回軍拒戰敗績十六年三桂入滇

康熙三年水西土酋安坤謀反初坤既歸命有常金印者自云

開平王後自粵至與坤謀不軌又有劉永甯倪生龍丁調鼎李

化龍等至阿堵牛場言海上已立新君國號平順晉王李定國

尚在諭令起兵坤遂聚眾數萬以升如鼎為總統通貴州土司

羅大順等約共取雲南坤師張默之妻父皮熊熊本江西羅聯芳也爵匡國公

為孫可望所敗遂亦使蜀人陳進才等各路給散劄付總兵沈

祝髮水西可卜河



應時獲進才以報三桂督雲貴兵分兩路進討三月自率滇師由畢節七星關取道米羅歸宗直入果勇令總兵劉之復駐兵大方遏其衝逸檄貴州提督李本深統貴州四鎮兵由大方之六歸河會剿屯糧三岔河期首尾夾攻而檄文誤書六歸爲陸廣於是本深駐兵陸廣黔蜀所調糧儲亦盡屯於陸廣鎮西以致兩路聲援皆隔絕不通三桂軍於龍場見糧將絕外援不至永順總兵劉安邦力戰死軍亂夷勢益張適水西土目安如鼎遣人偵黔營虛實爲本深所獲始知滇兵被困乃使爲鄉導鼓勇進兵副將白世彥手斬夷目以罵於陣以罵者坤之驍將也旣斬夷衆遂潰總兵李如璧亦率精兵直入兩路兵始合爲一旣敗之於阿作峒又敗之於初得峒九月又敗之於紅巖峒坤

率其妻祿氏奔木弄箐由烏撒至烏蒙烏蒙不納坤遣漢把會經賚印請降三桂不許分兵追擊生擒坤於大方之杓箐十月又擒皮熊於烏撒皮熊時年八十餘面責三桂三桂不能答絕食十五日而死水西平三桂請建郡疏略云水西古號羅甸鬼國相傳始自唐堯明王守仁辨爲傲象遺裔至漢浸大歷唐宋元明之世日益强大諸郡莫不凜承順旨於滇爲咽喉之病於蜀爲戶牖之狼於黔爲腹心之蠱毒明天啟年間蠻長安邦彥構難發端遂困黔一載城中殺人爲食市坊壘骨如山酋首西寇馬龍志欲洗兵滇海東抄遵永更圖牧馬成都是時六詔如坐井中聲氣經年永絕滇人不得已之計乃請開間道粵西往事之害如此顧當年會調六省士馬費千百萬金錢以剿先後



二十年竟未能克今者渠魁旣繫黨羽全芟設流之制請得陳之議照滇黔十郡提封要不過中通一線此外皆生苗部落故以水西截長補短較之約敵全黔十分之六今裂其土以爲郡撫其民以供耕可增如許軍糧聊佐公家萬一之計卽黔之爲省亦得以稍展幅員是向之害黔者今且益黔矣查水西地有十一則溪度量延袤之形其地可置四府數十州縣但恐經大創之後人民死損甚多可先設三府以試其治擬將隴勝的都梁你阿架四則溪設爲府建府治於比喇將法戈大著木胯架勒四則溪設爲府建府治於水西城各領以流官知府悉隸貴州布政司原設分巡畢節道原以控制土司今水西已平應將該道改爲整飭三府分巡貴寧道兼管永寧赤畢等衛駐劄比

喇比喇一府設推官一員承理三府刑名大案俾有責成再所設三府不便以比喇大方水西爲稱宜改新名三桂疏載南昌劉健庭聞錄其書未刊傳寫多訛舛脫漏按貴州通志康熙三年安坤與烏撒土知府安重聖謀反討平之以水西十一則溪地設三府以大方爲大定府木胯火着架勒化各四則溪屬之以水西爲黔西府則窩以着雄所三則溪屬之以比喇壩爲平越府的獨梁你要架隴勝四則溪屬之則溪羅鬼語猶華言唐之州宋之軍也改烏撒爲威寧府

錢邦芑字開少丹徒人官都察院初由閩至粵旣由粵至滇滇破祝髮雞足山號大錯和尚三桂子應熊省親遇之於貴州道中出語不遜應熊執之以見三桂三桂笑曰是欲辱我以求死



所耳吾兒正墮其計矣命亟釋之

癸丑年三桂反十二月貴州兵譁總督甘公文焜自度不能支謀東扼鎮遠初八日至鎮遠知府張維堅副將江義先已受逆命令阻公毋東兩人猶豫不決有守備某者以考試懷恨力勸從賊且自請阻公公之未顯也會問終身於朱山人山人曰一路功名到吉祥公被阻逡巡度橋見吉祥寺愕然曰前定矣遂縊子某筆帖式雅圖華善從死兵部郎中黨古里戶部郎中席蘭泰戶部員外薩木哈兵部主事辛桂先在貴陽爲三桂夫馬芻糗備反聞至黨古里等馳出赴京上變惟桂先不及行與筆帖式薩爾圖俱爲李本深所害三桂至貴州以本深爲貴州總管大將軍巡撫曹申吉先削髮遁召見與潘超先張文德等俱

黔記卷四

四

以原官用次年正月至鎮遠

三桂死吳世璠僭號至貴州舉會試以陳循爲一甲第一人循修文人

四川提督王之鼎援永寧賊衆我寡被圍數匝三閱月糧盡援絕賊以火藥轟城陷之鼎被執自刎不殊昇至貴陽夏國相等說降不從被害北門川主廟前同時死者總兵何成德王永世劉奎傳汝友副將楊玉虎傅富游擊陳田陳先鳳兆藏保劉應科從征廕生潘濟世從征立功陳應科十二人

二十年世璠還雲南大兵鼓行而前僞將軍韓天福拒戰平越敗績世璠遂遁僞大學士郭壯圖遣線緘援黔拒戰江西坡提督桑格前鋒陳珀中礮不能軍將士損傷過半大敗其實與賊



未交鋒也江西坡山崇隆險峻曲折盤旋繞山而上如螺紋然賊負山險以象迎戰我師見象出卽驚潰蔡毓榮遣紅旗督戰衆崩不可止紅旗亦不返兩日夜方死屍山積大約死於賊者十之二三顛踣死踐踏死捷足者先奔奔者繼至謬謂追兵自相格鬪殺死者十之六七今坡下犁鋤間往往猶見白骨也是役也我兵雖挫諸軍繼進者日衆線緘不能支棄險西走僞將軍何繼祖等扼黃草壩以守而征南大將軍賴塔偕都統勒貝都統希福馬齊趙連護軍統領額黑里副都統洪實錄祖植椿兩廣總督金光祖福州將軍馬九玉等由泗城州奪石門坎拔安籠所繞出賊後遂大破之

王四者吳商也恃三桂勢在貴州所爲多不法總督甘公治其罪逐之出境盡反所奪廬舍子女三桂不能留也以上七條載庭聞錄

蔡毓榮平南紀略載其統兵入黔也曰康熙十九年四月丁丑賊望風宵遯我師會次沅州廣樹先聲徧爲招撫將略思南徇同仁取石阡出印江攻塘頭出思州奪老烏溝以乘勝入黔而羣賊力守鎮遠夫鎮遠固黔中一咽喉地也駐沅以來糧充器銳士馬飽騰十月甲午師次周倉坪賊憑高恃險抗衡如舊丙申分兵三路一由秀地取石巷巖門一由鎮遠縣旁出攻其腹地而予帥官兵正擊其面賊不能支是夜漏下五刻各亡命去我兵追殺過由柞關偏橋至興隆而止壬寅師次重安江癸卯進清平近地賊營聞風解散十一月辛酉全師駐貴陽先鋒抵



安順惟鐵索橋江勢湍激巉巖層立浮渡萬難賊焚橋負嶠以冀復振已已我軍飛渡仰擊大敗賊兵所謂要害之處咸我有矣行師至此我馬疲敝稍爲養息二十年師至安南至沙子哨與賊大戰於江西坡轉鬪而前得臘笳坡賊敗走收新興普安其諸郡縣皆歸順

威寧多鉛廠舊礦產鉛不旺且每歲夏時中多積水車戽之費較昔日增又從前官鑪不足則買商鉛以補之商先領官本從容繳鉛頗以爲利故樂於輸送今則發價漸少輸官之餘無多利息商鉛可買者稀官鑪所得不足使公項盡歸實用猶患費用之繁倍出半入而奸胥蠹役欲借開廠爲名飽其私橐者更甚於前運務之壞較然可覩也每歲四運京鉛一運楚鉛恐其

弗給勢必議開子廠但此事非可促辦向來產鉛之地土人視其可開具呈報州縣官批准令其自備貲本開採一年有效然後州縣官申報官辦一年有效然後申請領官本經理必三五年乃有成局如未開之地聽商人言其有鉛可採遽發官項與之則一年無效或不甚旺便已賠累巨萬州縣官豈肯爲之卽富商大賈其取利之途甚多亦不樂於一試也故子廠之說亦屬迂緩難行誠使司事者能以數萬金之美缺不肥已囊嚴禁吏胥家人侵漁諸弊於現採之礦設法經營實力辦理多招商人擇其可信者先發官本令其陸續交納則於運務廠務兩無貽誤如廠中常有三年之餘何虞誤運哉新開子廠入礦不深可省脚費亦無戽水之勞仍聽商民自報自開悉如舊制多一



處不爲無益但目前所急者不在此耳

鉛廠中亦多可怪者商民開礦視其命運有見鉛苗並得其穴而勞苦經年費用巨萬而無所得者礦中或沙或水開閉不常此亦陰陽之理不可測耳有富者買一山鳩工開鑿入其中無有也視其苗則決必得之於是罄家貲親往督理貲盡矣乃持鎚向石而咒曰我爲汝亡家今與汝并命矣鎚落石破而鉛出就其穴探之復其財而穴乃罄又有兄弟二人共開一山者山有兩穴其弟先私開之一有鉛一無鉛乃與兄鬪兄得有鉛者夜半往掘取其鉛置已穴而以已穴之土石置兄所鬪得處旣開礦弟乃陽言曰兄之穴皆土石願以弟所得者讓兄也兄曰吾與弟均耳弟曰否遂互易其礦及開數日兄礦益旺而弟竟銖兩無所獲

每鉛一爐或白金一塊或數錢或一二兩啟爐時工人必合聲痛詈曰汝速死汝速死詈不絕而啟之則一餅躍出弗詈則無所得金之畏詈乎好詈乎雖有智者莫能喻其故也

興義守某有婢死而埋之數日過其處者聞棺中有哭聲走告某守出之復活

永寧州署三堂有鬼蓋州牧某杖斃其妾婢三人瘞於堂之後每爲祟今州牧別爲室數楹於二堂之東偏以居而以三堂爲驛館過客宿焉知者多移宿於城南二十里之新鋪然其地湫隘不可居余往興義去來皆住州署僕輩畏甚點燈後俱逃往主人鬪者之所余與幕友李鄴芸楊擴葦飲酒縱談至更餘就



寢天明乃起毫無所見聞也堂三楹余獨寢東一室鼾卧如常而李與楊同處西偏竟夕不能寐

藩署修屋毀舊垣及半得瓷盃一缺其邊之半安置甌土中盃貯茶油滿焉莫測所由入遂止不毀夜有宿其旁者燈下見巨鼠一自背至尾皆油沾濡就盃缺處刮其油注於盃畢乃去少頃復來刮如故乃悟垣中舊有一盃鼠每夜就油餅以身漬油來刮之蓄以爲糧者也福方伯親告余余謂此鼠智則智矣顧垣已毀而猶不知又何其愚也

省城一女子父母歿不嫁豪俠善騎射獨處一室時或反鍵其戶匹馬男裝遊湖湘間人不識其爲女也數月歸則閉戶不出精於刺繡得遊貲則又躍鞍出郭不知所之幕友李鄴芸爲余言鄴芸曾見之隣居不敢與言婚者亦不知其姓

貞豐州羅斛冊亨皆多瘴氣人病瘧者多死江西之賈於羅斛者必經三瘧乃可保有賈某姓已十八病矣

俗稱妻父爲泰山以有丈人峰也因此遂稱人妻母爲泰水更可噓者謂人妾父爲邱垤妾母爲行潦黔中納寵者母必隨以來久則驕恣詬諱之聲不可聞也試用令某在黔納姬其母頗悍時爲所窘令與余善余於端午日在黔西道中遇驟雨山水陡至幾被漂溺及返會垣令迎於道旁慰曰別來無恙乎余曰惟天中節爲行潦所虐耳令大笑

黔人生小兒多寄人爲乾子呼其義父曰保爺至有寄於巨石者於石上鑿其兒名呼之曰石保爺



諺云清平豆腐楊老酒黃絲姑娘家家有今清平縣豆腐尙佳  
楊老土司城有白石數枚立於城南頗奇峭而酒則甚薄黃絲  
去平越四十里爲官路所經有數百家村落較他處略整潔而  
當墟冶艷殊未見之蓋風化之轉移久矣

諺又云大定水城女如花黔西兒郎賽過他畢節姑娘家家好  
惟有威寧苦蕎粍粍者以蕎麥麵爲粍言其黑威寧地瘠人  
皆食蕎故云

鄒小山一桂自作楚黔山水畫冊筆墨精妙題句皆關考證雞  
公嶺詩云山行靄靄是晴天牛背兒童帶雨眠此日青疇喜霑  
足數峰烘出米家顛誰將潑墨嗣前蹤遠近煙巒試淡濃我是  
九龍山下客短歌多半雜吳儂涵碧潭卽城南甲秀樓詩云休誇辟棘

自唐蒙

聖代車書夔粵通陶逕娛賓聊暇日庾樓成唱續高風捲簾花  
色三秋候憑檻霞光萬嶺中試跨雙虹看題柱衮衣今日正思

公樓前有鐵柱記西朗照如君真月鑑餘波贈我亦天紳偶於

黔地歌三疊並想燕臺少一人薄宦自憐增白首亂山猶喜隔

紅塵回瞻帝闕無多別遙約梅花綻早春戊午九日登甲秀樓送阮主試卽依贈韻

照壁山云山勢裁成幅帆開未見舟遊人常面壁落日好登樓

萬井容窗隙千峰插案頭率然環雉拱卓爾畫扇秋拂蘚尋題

句憑欄恣遠眸嘯空宜舞鶴飛杖欲乘虬新月城笳動疎鐘梵

唄幽歸來衫袖重攜稿上鳴騶題東山十二景和潘椽亭元韻

八首云青歸楊柳枝紅入桃花面獨有歲寒松春來自不變蹋



閣上層巔忽然身入海擬作幻屢觀洶波成變隸山居看朝日  
飲露還餐霞蔚然藍幕間爛漫垂天花雨來聽其鏗風度有餘  
響銅鼓本無聲千秋白靈爽卓立一屏開螺黛千松點蒼翠佛  
頭深紅塵豈能染深柳亂紅橋澄波挂天影何來南海潮吹上  
西風嶺翠竹蔽蒙茸白雲穿窅窕提節入竹行清風散炎歊龕  
火猶未明梵唄生虛室庭樹何蒼蒼回頭見落日石阡云孤標  
凌太虛受氣變霜雪叢木不能附點綴辭一切稜稜表寒谷子  
子挺高節山爲仁者樂毋乃太勇決那知堅壁中泉脈出自穴  
虛中涵智水流潤生膏澤外樸內文明此圖可觀易豈徒誇石  
筍椽筆書天闕白水河云吾吳富水黔富山有山無水山不活  
深林祇覺嵐氣重多穴饒與狐兔窟十里一匊泉五里已成渴

涓涓伏流山草沒縱有清駛無人撥轉岡忽聞萬馬聲荒山鐘  
鼓何鏗錡遙看始見白一線匹練晝暴妖虹橫兩旁水氣浸石  
壁濺跳碎玉煙霏輕天紳長垂不可卷白竟歸壑山風鳴觀瀑  
亭中頓忘乏馬芻僕飯遲行旌山靈怪我笑枯渴獻此血脈流  
其精華峰蟻穴昔曾到莫炫怪異欺先生飛雲巖云黔中跬步  
皆巘岼籠煙接霧如星攢連晨陟降疲征鞍苦對童阜無奇巒  
茲巖腹豁誰所剗流膏垂乳出肺肝淋淋漓漓狀千般虎豹蹲  
立蛟龍蟠青虬玉蜺牽素輦蓮花倒放零露溥旌幢華蓋何靡  
曼一峰參禮對面看檻外珠玉飛來湍月潭疎磬應谷寒松杉  
百道清蒲團我遊心曠足力酸怪此山破精神完山僧常住無  
驚歡具相非相隨人觀相見坡云偏橋橋東相見坡行人聽見



苗子歌吹蘆大踏月皎皎搖鈴暗拍聲鳴鳴前坡草長苦雅務

田山蘆黔書雅務苗言難行也後坡石滑愁商訛言放牛阿李苗呼父呵交飲酒也在

前店阿蒙苗呼母夕雞坐也方陟巘回頭相見不足奇去去忽然還

對面山坳固麥喫飯謂之固麥趁泉流山前果食行路謂之果食人不休鵲啼

鷓鴣叫蚤風秋辰溪云凹字城頭丁字溪沿溪水閣亘高低朝來

盪槩和風裏不是桃源亦自迷一路花枝間柳枝客來剛是早

春時好山只合船頭看若在城中恐未知幫洞云三壺在海表

風烈不能舟秦皇覓不見漢武將焉求物理近可譬此山卽神

洲鴻濛未歸壑激盪成雕鏤一朝變桑田陸海膠浮鷗宛如白

蓮朶出放含清秋上結寶花臺疎磬鳴松楸得非壺公宅如此

邀浮邱盤旋轉蝸舍往返周華不蜂腰附蟣蝨蝓領飛蜉蝣對

黔記卷四

岸立鋒戟冠纓曜兜鍪湯湯濯古礎底柱滄溟流雀蛤以時變

夔虵憐其儔安知吾不化鼓翅隨莊周天柱縣云喜得兒童滿

手誇遍山穠豔勝桃花似應風急延春燒瞥見波明誤晚霞別

有洞天開絳帳始知黔地盡丹砂遐荒近得陽和溥萬笏參雲

耀日華白註天柱雉堞皆樓水通楚澤春夏間鵲花四面青山

四面樓一樓高出衆樓頭雨餘遙見清江路欲趁長風駕兩虬

喜得齊雲倚日開不愁前去有崔巍何人便說南天柱我亦蓬

山頂上來雪厓洞云劉崖營傑閣突兀傍城隈曲磴盤雲上朱

櫺耀日開遠煙清漳嶺秋色在樓臺隱約聞笙鶴仙人自去來

元洞何年闢穿幽透碧穹暗苔侵古佛落木響晨鐘壁淨塵難

到龕深膝可容有人誇白雪題詠最高峰辛酉秋深又當瓜代



諸公設餞於此又題云着破登山屐朝來得勝遊雉環千堞峻  
虹護一溪流漁艇晴波暖霜楓落照秋碧雞何處覓咫尺是丹  
邱筇竹枝爲友牂牁月是家六年邊地客一席小春花倚檻臨  
清瀨停杯看落霞遙程計歸雁萬里愧星槎序云一桂以雍正  
乙卯奉命督黔學隆冬就道逾大河歷江漢朔風欺鬢未暇觀  
覽丙辰春抵湖南泛舟沅江花柳爭媚沿流峭壁頗覺動人乃  
稿而笥之俟暇欲爲圖以嗣粵遊之冊旣入黔則萬山穿雲巖  
壑厓洞稱奇勝者不一而足顧以巡試匆匆未暇及戊午冬期  
滿作楚黔十二景一冊友人爭題之方伯雁門馮公見而攜去  
再索一觀不可得嗣又蒙恩畱任三年重經所過如遇舊知然  
欲圖之卒無其隙壬戌還京師從禮垣涼秋夜直宮漏方永靜

憶在黔六載披荆涉險如在夢中而林壑在胸不能去乃追而  
圖之得景十二幀譬如夢醒說夢而誕幻不妨姑聽也嗟乎卽  
以山水論圖中所列者可謂旁人未諳奇特如圖中者豈少哉  
不遇知己過而輒忘已爾在山水固無求亦無憾也然人不觀  
山水山水日起而觀人人之往來於黔山者豈少哉是冊也余  
將以之爲伯牙焉故題之曰山水觀我乾隆八年七月旣望錫  
山鄒一桂書於獨樹軒小山此冊於道光三年爲卓海帆少京  
兆所得海帆觀余黔中記遂以贈余因全錄其冊中詩文以資  
考證



黔記後序

蓋聞輶軒采風皇華備五善之義山川具說大夫擅九能之才  
顧有書與金繩多鴻彥所未識難得圖明鏤冊與象胥而等詳  
芝齡夫子於癸酉歲督學貴州成黔記一書二首六身異徵文  
於形象八蠻九貉符紀要於職方山海神異之經同資小說歲  
時風土之記足廣瓊聞削古緝今洵有合於太史陳詩之道攷  
靡莫之地三危奠其居據烏撒之隅七星扼其要元明以來草  
昧初闢我

朝定制幅隕以恢聲教被乎流沙九州同列化治浹於甌脫五  
服咸歸訓方懷方有誕粵之文德疆索戎索無羈縻之權謀形  
勝險隘可用而不可恃也戶口繁富可聚而不可散也風俗驕

黔記跋

悍可教而不可逞也物產苦窳可樸而不可華也於是隸之以  
版籍重之以軍防養之以農桑申之以學校屏翰旣樹荒徼斯  
馴二百餘期西南敕定揆諸前代蓋所罕聞且夫深維治變者  
國家固本之說也稽考利病者志乘紀載之實也葦篋藍縷撻  
荆楚以示威蠶叢魚鳧開巴蜀以益地莊躡楸船之策始於入  
滇唐蒙鑿空之謀因而置郡取二衛而歸統制控四省以重藩  
屏東則銅巖灘溪崆峒屹嶠紛沏泮沆相爲間阻西則赤虺蟒  
山蜿蜒嚶峒南則盤江索嶺大川鉅險老鴉哈馬巖關重固扼  
持上下如鑰鑰焉北有烏江瀉瀑揚濤西望峻峙秀潤參天廣  
袤一千六百餘里區域形勢實居天下要害之最至若厯倒馬  
坡玩犀牛洞石壁有影霜鐘飛聲雲蓋覆乎聖泉金橋灑夫夜



雨黃果入市衣有雪而猶輕白田聽鷲仙無樓而不謫釣雙明之鯉澄潭忽青喧官廨之蛙方池自碧松橫牟珠之洞石乳凝而蓮座開樓高相寶之山金鏡明而銅牛伏石鑪石確鬼設神施柳泉柳池波譎雲詭安順井潔煮胡麻而飯紅威寧水香映葡萄而珠綠聳甲秀於天半來華巖於西峙高真啟觀地面城以見山君子名亭驛臨風而偃草宏福寶利鉢峰巋然芹香講臺卓乎巽位真靈之所往來有張邈邇焉名儒之所棲託有尹道真焉尤其異者黑神之祠里社奉而喧闐大王之坡行客過而惕息荒誕傳會難以理論若夫夢白蓮而誕生師赤松以問道丈田爭議誇威鳳之獨鳴古研名齋誌懸魚之清節採翰藻文筆擷其秀感流離遷謫寫其況風雅摛掖文獻考徵又若湘

川梅竹共青芝以並生黔西海棠飄絳雲而不落蟬鳴稻熟蟻奪果繁紅遍山而鵲嬌黃過路而桃拂芙蓉變於一日藝草芳於四時柘樹飼蠶茂田園而客至刺黎來虎種籬落以春歸羊肚名菌產彼嘉蔬亦有羅鬼兼供采捋磨芋土芋出清平而味佳夾酒啞酒進壺棒而歡浹旨蓄是禦餼菜沸湯瘠薄時形齋粝食苦他如雅務果餼附方言之不同上會紮包詳嬉習之所自吹絲入市假朱提而銃充痛詈啟爐開子厥而礦旺端公治病爛螺卜以審吉凶送瓜祝禱名石保而延鼓吹爲齊諧之志怪則說鬼物資談柄焉紹炎徼之紀聞則揭治亂符考核焉柳細風清啞武臣之署榻下山拷火綴神廟之連場莫不蒼稗網羅廣其摭拾矣顧杼首魑結族類本殊有苗鬼方沿流遂夥獯



夷八十二種不無生熟之分府廳一十四屬定以筦轄所始長  
帑青帕此牙耀女官之緹堅甲利兵壑果習武夫之技六額洗  
骨大背孝慈八番剝木兼事漁獵捉白放黑乃市僧之奸插竹  
躡笙亦滌風之扇花球銅鼓逢跳月而歌呼偏架巴槽逞雄風  
而爭劇馬郎有房亦可醜也鵲聲喻父能無慟乎螻蠻佞佛之  
徒狎家畜蠱之習良由馬兵六百人所遺獮雜視夫田書三十  
種未備蒐羅亦有約束能遵徇楊保之鄉老讀書自好標紫薑  
之淳良藏旁輒之篇古風未泯織谷蘭之布民生在勤打牙剪  
髮遂其安全曾竹葫蘆居然食息洞苗菁苗之地性情化其桀  
鶩宋家蔡家之風表彰堪爲矜式抑有說者黔中典文弗備我  
夫子在黔僅十月校試止六郡搜志傳之所未載憶遊歷之所

曾經不以簡滋陋不以俗傷雅山水人物得失安危之大指於  
是乎見焉後之人因地徵圖披蒲考索尋奢香之驛水西迹陳  
登銀賴之山古州烽息徘徊龍里知表裏之相依顧瞻鴨池識  
強弱之有定馬跑泉出螺擁山高武帝經營想旌旗於在昔諸  
葛助望凜指揮於自今安堵怙然休養生息符竹所判蠻觸不  
驚將荆梁之區禹跡未墜參井之野歲星常臨所謂一人荷戟  
萬夫趨起骨肉鸞醢參商播凱者咸納諸大一統之中而全億  
萬年之計則此書也策治安防禍患非祇記輶車之鴻雪而實  
爲檇杙之嚆矢倘謂體例猶略以拾瀋見疑於乎慎矣受業黃  
景濂序





國語

民

國

中華民國八年